



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DCCCCX. ad annum MLXXIII.

Parisiis, 1644

Epistola V. Leonis Papae IX. Ad Petrvm Episcopvm. Gratulatur de eius erga sedem apostolicam obseruantia. Confirmat eius ordinationem, si secundum Canones fuerit promotus. Hortatur vt suae ecclesiae ...

urn:nbn:de:hbz:466:1-15625

EPISTOLA V.

LEONIS PAPÆ IX.

AD PETRVM EPISCOPVM.

Gratulatur de eius erga sedem apostolicam obseruantia. Confirmat eius ordinationem, si secundum Canones fuerit promotus. Hortatur vt suæ ecclesiæ dignitatem tueatur. Probat fidem ad se ab eo scriptam eandem esse quam tenet Romana ecclesia, cuius fidei summa capita ad eum mittit.

*Leo episcopus seruus seruorum Dei dilecto fratri
& coepiscopo Petro.*

Ioan. 13.

1. Cor. 1.

CONGRATVLAMVR vehementer in Domino tuæ sanctissimæ fraternitati, atque multimodas gratias, vt dignum est, referimus ei qui est vera pax & caritas suorum, quod tandem per te, carissime frater, videtur restituisse sanctæ Antiochenæ ecclesiæ studium, & sentire quod est sentiendum. *In hoc enim cognoscent omnes, quia Christi sumus discipuli,* (qui primum in ipsa magna Antiochia nominati fuerunt Christiani) *si dilectionem habuerimus ad inuicem, & id ipsum dixerimus omnes, & non fuerint in nobis schismata: si fuerimus perfecti in eodem sensu, & in eadem scientia.* Neque enim Deus, qui vnus est, in scissuris mentium, sed in sola vnitate, & puro corde habitat, & habitare facit vnanimis in domo. Alioquin domus exasperans erit, nec iam digna vocari ecclesia Dei, sed synagoga maligni. Porro sicut calamitosum est, si vnitas deest bonis: ita perniciosum, si adsit malis. Quod ipse ex specula sanctæ illius ecclesiæ, cui videris designatus diuinitus speculator, prudenti oculo considerans promotionem tuam ad episcopale fastigium, electione cleri & populi, sicut asseris, factam, atque fidem tuam secundum antiquæ consuetudinis religiosum & valde necessarium studium, apostolicæ & primæ sedis, cui, Deo auctore, quamuis indigni præsidemus, annuntiare & exponere curasti. In quo facto nouerit tua dilectio nos plurimum recreatos & gauisos in Domino: quia quod maxime oportebat, tibi & ecclesiæ, cui temporaliter præsides, non distulisti efficere.

Siquidem ab apostolica tua sede nostram apostolicam sedem consulendo, perpendimus tuam dilectionem nolle deuiare a dominico & omnium sanctorum patrum concordia decreto, quo inuolabiliter cunctis in toto orbe terrarum ecclesiis, sancta Romana & apostolica sedes caput præponitur, ad quam maiores & difficiliore causa omnium ecclesiarum definienda referantur. Sic omnia veneranda Concilia, sic leges humana promulgant, sic ipse Sanctus sanctorum, Rex regum, & Dominus dominantium confirmat, quatenus ibi principalis dignitatis, & totius ecclesiastica disciplina venerabilis apex præfulgeat & præcellat, vbi ipse vertex atque cardo apostolorum Petrus carnis suæ beatam resurrectionem in nouissimo die expectat. Nimirum solus est ille, pro quo, ne deficeret eius fides, Dominus & Saluator asserit se rogasse, dicens: *Simon, Luc. 22. Simon, ecce satanas expetiuit vos, ut cribraret sicut triticum: ego autem rogavi pro te, ut non deficiat fides tua: Et tu aliquando conuersus confirma fratres tuos.* Quæ venerabilis & efficax oratio obtinuit, quod hæcenus fides Petri non defecit, nec defectura creditur in throno illius vsque in sæculum sæculi: sed confirmabit corda fratrum variis concutienda fidei periculationibus, sicut vsquenunc confirmare non cessauit. Pro cuius excellentia tertiam a Romana ecclesia dignitatem retinet Antiochena, quam te defendere summo opere monemus, non tuæ gloriæ causa, sed pro sedis, cui ad tempus præsides, antiqua honorificentia. Nec reuocaris ab hac intentione cuiuslibet pompa vel arrogantia, quin constanter defendas honorem quem Antiochena ecclesia reliquerunt omnia sanctorum patrum Concilia. Ad quod vtique, si oportuerit, maxima mater, Romana scilicet atque prima sedes, tam dilectæ sibi filia, imo consociæ, nusquam & nunquam deerit. Quod totum ideo dicimus, quia quosdam conari minuere antiquam dignitatem Antiochena ecclesia audiuius.

Porro quod a nobis causas diuisionis vniuersalis ecclesie compatiendo requiris, fatemur tuæ religiosæ sollicitudini, nos adhuc a Domino miserante firmissime retinere vinculum sanctæ vnitatis: nec videmus nos alicubi incurrisse damnatum schismatis, quos integritas concordia, & plenitudo ecclesiastica disciplina indefinenter regit. Vni-

Romana
sedes, caput
omnium ec-
clesiarum.

Fides Ro-
mana sedis
non defi-
ciet.

cuique nostrum debetur honor, & sua iura conseruantur. Terminos, quos patres nostri fixerunt, nulli arroganter transgredi conceditur. Magis vestra fraternitas circumspiciat, ne qua radix amaritudinis atque dissensionis, quod absit, in vestris partibus succrescat, per quam inquinentur multi, & quamneceffe sit districta falce sanctorum Canonum a catholica ecclesie agro extirpari. Mea vero humilitas in culmine apostolici throni ideo exaltata, vt approbata approbet, improbanda quoque improbet, tuæ sanctissimæ fraternitatis episcopalem promotionem libens approbat, collaudat & confirmat, & communem Dominum instanter exorat, vt quod humano ore iam diceris, ante eius oculos existas. Noueris tamen, nos ipsam tuam promotionem taliter approbare, si non hanc neophytus, aut curialis, seu digamus, vel precio, aut alio quolibet modo sacris Canonibus contrario, quod absit, obtinuisti. Sane fidem tuam, quam proprio scripto summæ & apostolicæ sedi exposuisti, sanam & catholicam atque orthodoxam per omnia protestamur, & sicut vere vnicam & salutarem amplectimur, & tuæ dilectioni vehementer congratulantes in Domino, eandem nostram esse deuoto corde & prompto ore profitemur. Firmiter enim credo sanctam Trinitatem, Patrem, & Filium, & Spiritum sanctum, vnum Deum omnipotentem esse, totamque in Trinitate deitatem coessentialem & consubstantialem, coæternam & coomnipotentem, vniusque voluntatis, potestatis & maiestatis: creatorem omnium creaturarum, ex quo omnia, per quem omnia, in quo omnia, quæ sunt in cælo & in terra, visibilia & inuisibilia. Credo etiam singulas quasque in sancta Trinitate personas, vnum Deum verum, plenum & perfectum. Credo quoque ipsum Dei Patris Filium, Verbum Dei æternaliter natum ante omnia tempora de Patre, consubstantialem, coomnipotentem, & coæqualem Patri per omnia in diuinitate, temporaliter natum de Spiritu sancto ex Maria semper virgine, cum anima rationali: duas habentem natiuitates, vnam ex Patre æternam, alteram ex matre temporalem: duas voluntates & operationes habentem: Deum verum, & hominem verum: proprium in vtraque natura atque perfectum: non commixtionem atque diuisionem

Fidei Romanæ ecclesie explicatio.

passum, non adoptiuum neque phantasticum: vnicum & vnum Deum, Filiū Dei in duabus naturis, sed in vnius personæ singularitate: impassibilem & immortalem diuinitate, sed in humanitate pro nobis & pro nostra salute passum vera carnis passione, & sepultum, ac resurrexisse a mortuis die tertia vera carnis resurrectione: propter quam confirmandam, cum discipulis nulla indigentia cibi, sed sola voluntate & potestate comedisse, die quadragesimo post resurrectionem cum carne, qua surrexit, & anima ascendisse in cælum, & sedere in dextera Patris: inde decimo die misisse Spiritum sanctum, & inde sicut ascendit venturum iudicare viuos & mortuos, & redditurum vnicuique secundum opera sua. Credo etiam Spiritum sanctum plenum & perfectum, verumque Deum, a Patre & Filio procedentem, coæqualem & coessentialē & coomnipotentem, & coæternum per omnia Patri & Filio, per prophetas locutum.

Hanc sanctam & indiuiduam Trinitatem non tres deos, sed in tribus personis, & in vna natura siue essentia vnum Deum omnipotentem, æternum, inuisibilem & incommutabilem ita credo & confiteor, vt Patrem ingenitum, Filium vnigenitum, Spiritum sanctum nec genitum nec ingenitum, sed a Patre & Filio procedentem, veraciter prædicem. Credo sanctam catholicam & apostolicam vnam esse veram ecclesiam, in qua vnus datur baptismus, & vera omnium remissio peccatorum. Credo etiam veram resurrectionem eiusdem carnis, quam nunc gesto, & vitam æternam. Credo etiam noui & veteris testamenti, legis & prophetarum & apostolorum vnum esse auctorem Deum & Dominum omnipotentem: Deum prædestinasse solummodo bona, præsciuisse autem bona malaque. Gratiam Dei præuenire & subsequi hominem credo & profiteor, ita tamen, vt liberum rationali creaturæ non denegem. Animam non esse partem Dei, sed ex nihilo creatam, & absque baptismo originali peccato obnoxiam credo & prædico.

Porro anathematizo omnem hæresim extollentem se aduersus sanctam ecclesiam catholicam, pariterque eum quicumque aliquas scripturas, præter eas, quas catholica ecclesia recipit, in auctoritate habendas esse crediderit, vel

Ita diuus
Gregorius
epist. 24. li-
bro 1.

veneratus fuerit. Quatuor Concilia omnimode recipio, & velut quatuor euangelia veneror: quia per quatuor partes mundi vniuersalis ecclesia in his, tamquam in quadro lapide, fundata consistit. Primum, Nicanum trecentorum & octodecim patrum sub beato Siluestro papa Romano, & Constantino Augusto magno: cui præfuerunt Victor & Vincentius Romani presbyteri. Secundum, Constantinopolitanum primum centum quinquaginta patrum sub Damaso papa & Theodosio maiore. Tertium, Ephesinum primum ducentorum patrum sub Cælestino papa & iuniore Theodosio. Quartum, Calchedonense sexcentorum & triginta patrum sub beato Leone papa, & Marciano Augusto.

Pari modo recipio & veneror reliqua tria Concilia, id est, secundum Constantinopolitanum sub Vigilio papa & Iustiniano Augusto: deinde tertium Constantinopolitanum contra Monothelitas sub Agathone papa & Constantino nepote Heraclii: Vltimum, secundum Nicanum sub Hadriano papa & Constantino Irenes filio, pro reuerendis Domini Iesu Christi & sanctorum imaginibus. Quidquid supra dicta septem sancta & vniuersalia Concilia senserunt & collaudauerunt, sentio & collaudo: & quoscumque anathematizauerunt, anathematizo. Hanc fidem sancta Romana & apostolica sedes corde credit ad iustitiam, & ore confitetur ad salutem. Secundum hanc viuere, Domino donante, studet, & pro eius defensione, si oportuerit, mori parata est. Quam & in te, frater carissime, perfectam cognoscimus, & secundum eam te viuere nobiscum admonemus, profecto scientes quia fides sine operibus mortua est. Salutamus cum omni fraternitate seu collegio sanctæ Romanæ & apostolicæ sedis tuam fraternitatem sanctam, cunctumque collegium in Domino tibi subiectum: & vt pro nostra gemina salute omnipotentem Dominum iugiter exores precamur plurimum, reuerende & desiderabilis frater.